

Te aworaki departamento Arubiana/Caribiana ta mantene su statuut actual

ORANJESTAD - Directora di departamento Arubiana/Caribiana, sra. Des Croes a declara na Bon Dia Aruba cu e departamento aki ainda ta conserva ainda nan structura actual.

Esaki kiermen cu nan no ta bay den structura nobo di un fundacion como si ta e caso di e museonan. El a referi e tempo cu a wordo haci e “kerntaken analyse”, caminda Biblioteca Nacional hunto cu demas departamento di gobierno tabata parti di analisis aki. Pero despues di esaki no tabatin un desaroyo nobo.

Pa loke ta trata e departamentu di Arubiana/Caribiana y Biblioteca Nacional, sra. Des Croes ta kere cu nan ta brinda un servicio publico. “E no

ta un servicio cu ta genera placa, pero e ta un servicio cu ta aporta na e desaroyo di bo ciudadanonan”, el a bisa.

E ta haya cu e servicionan cu nan ta brinda, gobierno tin su responsabilidad pa cu esey. E departamento mes di Arubiana/Caribiana nan ta conserva y salvaguardia nos patrimonio cultural documental. Mirando e servicio publico cu nan ta brinda na comunidad gratis, e no ta kere cu un cambio di structura di e departamento aki lo sosode lihe. Ya cu manera otro departamentonan di gobierno, tin biaha nan ta confronta e situacion cu nan mester sigui funciona cu menos fondo y percursa di baha nan gastonan.

Hopi corant y poco espacio



Departamento Arubiana/Caribiana ta trahando pa conserva tur su coleccion di un forma optimal. E departamento aki ta cay bou e mesundak di Biblioteca Nacional

Aruba, y su tarea ta di conserva y haci posibel e acceso di nos coleccion nacional, ya sea pa investigacion of consulta.

Den nan plannan nan a cuminsa digitalisa parti di nan materialnan. Tin otro di nan coleccion nacional cu ta obranan valioso y antiguo cu no ta responsabel mas pa laga hende ni mishi cu nan. Nan ta buscando e forma ideal pa conserva nan di otro manera tambe.

E ta haya cu esaki ta bay ta e reto pa futuro cercano, esta e parti di digitalisacion di nan materialnan di coleccion, ya sea publicacionnan, audio visual, potretnan, etc...

Tin algun material cu nan ta conserva como corant cu ta nifica hopi volumen, y cu ta necesario pa cuminsa

traha proyectonan cu nan. Sra. Croes a indica cu ta importante pa bin cu proyecto grandi cu nan coleccion di corant. Nan hemeroteca ta contene entre 60 pa 70 aña di diferente corant cu a wordo publica y circula na Aruba, y esunnan actual.

E cada aña e cantidad di corant cu nan mester warda ta asina grandi cu nan ta evaluando un solucion. Un posibilidad ta di warda un ehemplar di cada corant como parti di nos patrimonio. Ya cu e consulta di e diferente corant di antaño y actual ta wordo consulta hopi.

“Hopi hende ta bin haci uzo di nan. Nan kier haci uzo di corantnan di tal aña pa nan busca informacion”, sra. Croes a declara na Bon Dia Aruba. □